



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir\_yimym



tir yimym

TAPAK 3

**Marine Le Pen-i France sorkar chirepdaktsüsü amokmeren**

**Rashid-i Parliament Winter Session nung adentsü atema bail meshi**

VOL. XXII ISSUE NO. 47 (ADOK 47) DIMAPUR SANGTENNÜ (TUESDAY) YIMPOKSÜI (NOVEMBER) 26, 20 ₹ 5.00

## Dec 4 nü PARAKH Rashtriya Sarvekshan agitsü

**Dimapur, November 25, 2024 (TYO):** December 4, 2024 nü linük den külemi Nagaland nung PARAKH Rashtriya Sarvekshan (NAS) 2024 agitsü.

Govt. schools, Private Unaided aser Central Govt. schools 742 nung sample classes 1077 survey asütsü ta State Mission Director, Samagra Shiksha-i metetdaksü.

Iba sentong nung Field Investigators (FIs) 1187, Observers 742 aser students 25132-i shilem agitsü.

NAS indang osang ajanga Nagaland nung grade 3, 6, aser 9 indang educational health metettsü aser iba osang nung ajemdaker Performance Grading Index (PGI) asadangsü.

Class 3 aser 6 atema survey ji minute 90 aser Class 9 atema minute 120 agitsü. Class 3 aser 6 nung Language, Mathematics aser World Around Us aser Class 9 nung Language, Mathematics,

Social Science aser Science atema asadangsü.

Iba anogo nung Sample schools nung School Heads aser tesayurtem ajak alitsüla aser Directorate of School Education, SCERT, NBSE o Samagra Shiksha ketdangsürtem den District Level Coordinators-i December 3, 2024 nü school tem semdangsü.

Iba survey atema district 16 nung Field Investigators indang training December 2, 2024 nü agitsü.

District Educational Officers, Field Investigators (FIs), sample schools School Heads aser kaketshir ajak PARAKH Rashtriya Sarvekshan (NAS) 2024 nung shilem agitsü mepishir.

PARAKH Rashtriya Sarvekshan (PRS) dang taoba mapang National Achievement Survey (NAS) ta aja aser iba ya national level large-scale assessment ka lir.

## Nagaland Governor-i Nasha Mukta Bharat awareness campaign tenzüksü



**Kohima, November 25, 2024 (TYO):** Nagaland Governor La. Ganesan-i Hombarnü Raj Bhavan nung Brahma Kumaris' Nasha Mukta Bharat Awareness Campaign indang rally tenzüksüo.

Iba ya 2020 küm tenzükba Nasha Mukta Bharat Abhiyaan nung shilem ka lir aser drug-free India akümsü nükjidong lir.

"Iba campaign ya osang prokshitsü atema dang masü saka drug addict tem nem shisatsü agütsüsü aser yaritsü atema lir" ta Governor Ganesan-i ashi.

Nasha Mukta Bharat movement ya linük ajungalen drugs achiba khuret azüoktsü atema agir aser Nagaland-ia iba mission nung tongti shilem agitsü ayongzükter, ta pai ashi.

Iba movement nung nükjidong pezü lir aser itemji prevention, education, treatment, aser rehabilitation lir, ta Ganesan-isa ashi.

"Nagaland nung lanurtem dak tarutsü inyaktettsü sempettem keta lir aser linük tejakleni aotsüba

nung shilem agitettsü. Ajisüaka iba ya tongtettsü asoshi lanurtem dang drugs machitsü aser temang junga anepalutsü tesayubatam agütsüsüla" ta paisa ashi.

"Brahma Kumaris-i asüngteta alitsü, yimjung aser pei sasa tashi aittsü tangatbatem ajungketer aser iba atema parnok nem tenüngsang agütsür. Parnoki agiba campaign nung government agencies, civil society, aser public-i yariteptsü ayongzükter" ta Governor Ganesan-isa ashi.

Iba sentong nung 'My India Addiction-Free India' campaign National Coordinator & medical adviser Dr Sachin Parab-i okila jemi aser Medical wing Rajyogi Secretary Dr Banarasil Shah-i Nasha Mukta Bharat abhiyan indang osang lemsatep.

Iba sentong ya Brahma Kumaris Medical Wing-i ayongzük aser mendenji Kohima Branch of Brahma Kumaris Director & Programme Coordinator of Nagaland Rupa liasü.

## 'International day for the elimination of violence against women' among



**Dimapur, November 25, 2024 (TYO):** Nagaland nung tanü "International Day for the Elimination of Violence Against Women" mongogo.

Tanü SIRD auditorium, Kohima nung agiba sentong nung '16 days of Activism against gender-based violence' tenzüka liasü.

'Towards Beijing +30: unite to end violence against women and girls' omen nung ajemdaker agiba sentong nung Advisor to Chief Minister & Chairman IDAN, Abu Metha-i tetushi süa jaoker ka ama shilem agi.

16 days of Activism against gender-based violence ya global campaign ka lir aser tetsür o tanurtem anema ozüng alema inyaksangshiba anentsü osang prokshitsü atema agir.

International Day for the Elimination Of Violence Against Women ya kümshia November 25 nungi December 10 tashi amonger. December 10 ya Human Rights Day lir.

"Nagaland aser linük kübok tesem balala nung ozüng alema maparen inyaksangshiba ataloker aser asenok longjemer iba tayongzükba anema inyaksüla" ta Advisor to Chief Minister & Chairman IDAN, Abu Metha-i ashi.

Linük nung lendong nung jenbua aliba state rongnung Nagaland ya ka ta züngshir saka ibaji tiyazü ama lir, kechiyong

kidang aser temeket nung tetsürtem dak ozüng alema inyaksangshir aser aiben item osangji meprokhii miimbanga ayur, ta pai ashi.

Asenoki asen sobaliba aser senmang takar indang jembir aser tetsürtem ya Naga loktiliba nung tongtired ta ashir saka chichiba nung anogoshia tetsürtem dak tashiyim mapa inyaker, ta Mehta-i ashi.

"Naga loktiliba tejakleni onüra asenoki tetsürtem aser tetsür tanurtemi ajuruba tayongzükbatem atema inyaksüla. Naga loktiliba külemi tetsürtem akhüm atema inyaksüla aser tetsürtem akhümsübuttsüla" ta paisa ashi.

"Kohima nung yaküm tetsür dak tashiyim inyakba ken o 10 aser taküm 12 benoka liasü" ta ADC Kohima, Rhoisetho Nguori-i ashi.

"Nagaland nung sendaktepa alir ajaki tetsürtem dak tashiyim inyakba anendaktsüsü aser samatsüsü atema shilem agitsüla. Asenoki asen kidang, kiyong, schoolm, tenla ki, lokti aser ajaklen iba atema shilem agitsüla" ta Nguori-i ashi.

Hombarnü Chumoukedima Town Council hall nung Social Welfare, Mission Shaktip & Mission Vatsalya Nagaland State Rural Livelihood Mission aser Chumoukedima & Dimapur District administration tem

yaritepa sentong ka ayongzüka agi.

Tetsürtem aser tanur tetsürtem anema inyaksangshiba samatsüsü atema tera nungi mapa inyaksüla ta Social Welfare Secretary Martha R Ritse-i ashi.

Ketdangsürtem aser lokti ajaki iba mapa atema inyaksüla. Tetsürtem kümzüka ayuba dang masü saka awareness campaign agitsüla aser timtem ajuruba tetsürtem yaritsüla ta lai ashi.

"Naga loktiliba ya teburtemi senmanga lokti lir anungji tsüraburtemi tetsür o tebur kasa ta asüba tesayuba agütsüsüji kanga tongtipang lir. Tila asüadang nungi pei chirnurtem dang tetsür o tebur telemsa mali ta asüba tesayuba agütsüsü nüngdaker" ta Ritse-isa ashi.

"Women Helpline Nagaland aser One Stop Centre indang data ajanga tetsürtem dak tashiyim mapa teimba inyakbaji pei kidang lir ta ashir. Tanabubaji cybercrime mesüra tetsürtem anema cyber violence lir aser iba inyakyim ya tanü technology kanga amshiba ajanga bulua ataloker. Iba inyakyim ajanga lanuputu dak tuluba kongshir anungji asenoki süoki ia bilemstsüla" ta laisa metetdaksü.

Iba sentong nung Joint Secretary Rural Development & Mission Director, NSRLM Imtinenla-i Chetna 3.0- gender based Campaign tenzükja liasü.

## Parliament Winter Session tenzükba anogo nung senden melitet

**New Delhi, November 25, 2024 (Agencies):** Hombarnü nungi Parliament nung Winter Session tenzük saka senden tenzükli nungi meinprongba ajanga tanü atema senden malitsüsa aküm.

Rajya Sabha nung Opposition MP temi Adani ken o benoka lemsateptsü rongshiba ajanga session magitet.

Hopta pezü atema Winter Session tenzükba anogo nung Prime Minister Narendra Modi-i

Opposition party tem luja jemi.

"Elections nung nübortemi magizükertemi Parliament inyakyim meinprongsü meranger" ta PM Modi-i ashi.

"Nübortemi 80-90 ben magizükertemi Parliament nung olemtep melidaksür. Parnoki nübortem taginübatem mangateter. Party shia nungi MP tasentemi Winter Session nung parnok tebilembatem lemsateptsü maongka angutsü

imlar" ta pai ashi.

Tan Winter Session nung BJP-i aniba Centre sorkari Waqf (Amendment) Bill benoka agizüktsü merangtsü. Iba bill ya Joint Committee of Parliament kati repringdar, iba dak alia Centre-i bill 16 benoktsü metetdakja lir.

November 26 nü 'Constitution Day' amongtsü atema Lok Sabha aser Rajya Sabha nung senden kecha malitsü.



# Niuland nung International Day for Elimination of Violence Against Women amung



**Dimapur, Yimpoksüi/Nov. 25 (TYO):** International day for Elimination of Violence Against Women aser '16 days of activism against gender based violence' tenzükba nungtem nung awareness sentong ka Government Higher Secondary

School, Niuland nung November 25, 2024 nü agia liasü. Iba sentong ayongzükba nukjidong EAC Niuland, Kelengunuo Solo-i lemsatep aser Allobo. K, Legal cum probation office ajanga

kakatshir dang tetsür temeden aser tetsür kumzükba ayutsü asoshi yangluba tüzüing-ozüing balala indang rateta ashi. Sentong tembanga District Welfare Officer, Sentimenla Pongener-i melepzüing o jembia liasü.

# December ita Nagaland atema Agniveer Recruitment Rally alitsü

**Dimapur, Yimpoksüi/Nov. 25 (TYO):** Nagaland nungi shortlisted candidates tem atema Agniveer Recruitment Rally ka December 16-19, 2024 anogotem Indira Gandhi Stadium, Kohima nung alitsü, ta Indian Army ajanga sangdong ka nung ashi.

Admit card download asüba mapang timtem ajurura candidate temi Army Recruiting Office (ARO), Rangapahar den landline number 03862-249012 mesüra mobile number 7628023484 ajanga jembia teyari agitsü akok.

Headquarters, Police Station mesüra Rangapahar nung aliba Army Recruiting Office nem osang agütsüsüla.

Iba rally ya Agnipath Scheme kübok ayongzüksü, kong Nagaland nungi lanurtem Indian Army nung adentsü asoshi maongka tajung ka agütsüsü.

Iba recruitment inyakyim ya merit nung ajemdaker lir, aser candidate temi written, physical aser medical examinations ajangettsüla.

Iba recruitment atema online Common Entrance Exam ya April 22 aser May 3, 2024 tsüingta agiogo aser results ya candidate tem nem email ajanga agütsüogo aser official website nunga angutsü.

Shortlisted süa aliba candidate temi pei indang admit card tem 'Joint Indian Army' website nungi pei indang register süa aliba email ID aser password amshia download stütetsü, ta ashi.

Agents mesüra nisung shingaia result nung teka maittetsü, anungji candidate tem dang ashi-külak mapa inyaktsü merangba nung malangtsü ajungshir, ta Indian Army ajanga ashi.

Agnipath Scheme yagi Nagaland nung aliba lanurtem nem employment tsütsü maongka tajung agütsüsü aser parnok linük indang defense forces nung aيتدaktsüsü nukjidong lir.

Yamala mapa inyakba ajangshira anasatiba Army Unit,

Osang tali tejangja official website [www.joinindianarmy.nic.in](http://www.joinindianarmy.nic.in) nung angutsü, ta sangdong ajangasa ashi.

# Kiphire nung International Day for Elimination of Violence Against Women amung



Deputy Commissioner, Kiphire indang Conference Hall nung November 25, 2024 nü International day for Elimination of Violence Against Women amungdang tangokba noksa ka nung EAC Kiphire, Takatemjen Pongen, NCS aser ketdangsürtem angur.

**Dimapur, Yimpoksüi/Nov. 25 (TYO):** Deputy Commissioner, Kiphire indang Conference Hall nung November 25, 2024 nü International day for Elimination of Violence Against Women munga liasü.

amala indang jembia liasü. Tetsür anema azüdokshiba ya sobaliba, region mesüra linük mesüra tetsür telok ka nung dang ataloker masü, kechiaser tetsür anema azüdokshiba tera ya arok nungi tenzük, ta pai ashi aser timtem ajurudang Sakhi - One Stop Centre, Kiphire nung ken o benoktsü ajungshia liasü.

lemsatepba nung balala amshiba nungi tetsür anema azüdokshiba tera tenzük, ta ashi.

Iba sentong nung EAC Kiphire, Takatemjen Pongen, NCS ajanga jembidang iba anogomung omen 'Unite to End Violence Against Women Campaign' nung rangloker jembia aser ibai nüburtem nem awareness agütsüsü aser yimten-i tali temlung agüja alima tesem ajunga nung tetsür anema azüdokshiba nungi kumzüksü aser tembangdaktsüsü asoshi lir ta ashi.

Tanü digital putu nung tetsürtem kumzükba ayutsü asoshi sorkari akokba mera ajak agia yariteper, ta pai ashi aser iba sentong nung adener den International day for Elimination of Violence Against Women indang tenangzükteper agitepa liasü.

Shisaliok nunga iba teblemetsü ya lir, kong tsürabur temi tetsür dang nungi tebur nem maongka tajungba agütsür, ta pai ashi.

Pai mapa inyakba tesem nung azüdokshiba, 'physical violence, sexual violence, psychological violence, economic violence'

Area Coordinator NSRLM, Kunyangli-i 'gender discrimination' indang onük nung jembia aser tetsür aser tebur tsüingta tashi aser resources

CDPO i/c DPO, DWO Kiphire, Sienotho ajanga pela agizükba o jembia aser Gender Specialist, DHEW Kiphire Albert Jingru-i special presentation agüja liasü.

Iba sentong nung Tsüingrem temoatsü meshia Associate Pastor Youth (Nito Mount), Lino G. Chishi-i sarasadem aser Centre Administrator, OSC Kiphire, Rolila S Sangtam ajanga melepzüing o jembia liasü, kong Limitsung Sangtam, specialist in financial literacy DHEW, Mission Shakti, Kiphire menden liasü.

# MENUNGRAA BILEMTETER



**Tialemla Longkümer**  
26:11:2023.

Temeim oja, tanü na onok nungi pilar küm ka ajunger. Mapangtem süitema oaka na mali onok mulung shirang manener. Tanü onoki na kanga menungraa amonger aser nü temeim anogo shia bilemteter.

- Temeim Chirnurtem, Semchirtem aser Anük-apang.

# Toyota Hornbill Music Festival nung Gareth Bonello-i shilem agitsü



**Gareth Bonello**

nung kenten benjong tulutiba lir. Gareth Bonello ya Wales nunger kentener, ken zülur aser cultural ambassador lir.

Taküm iba benjongmung nung Wales ya partner country ka amai lir, kong Bonello-i Wales otsü aser sobaliba bener arua ken ajanga nüburtem den lemsateptsü.

Bonello ya alima tesem balala sema Washington, DC nung aliba Smithsonian Folklife Festival nungi Beijing nung aliba Forbidden City Concert Hall nung ken tena jajaba takum ka lir.

**Kohima, Yimpoksüi/Nov. 25 (TYO):** Wales nungi Gareth Bonello-i Toyota Hornbill Music Festival 2024 mapang main arena, Naga Heritage village, Kisama nung shilem agitsü.

Nagaland Chief Minister Neiphiu Rio-ia "Hornbill Festival nung Gareth Bonello-i shilem agitsü yongya atar. Pa indang ken ajanga arütsü alema oa nüburtem ka kuma ketdangsüa ayongzükba Toyota Hornbill Music Festival ya India sayur," ta ashi.

Task Force for Music & Arts (TaFMA) ajanga lungjemdaktsüba tashi aliba sayur," ta ashi.

# Hornbill Festival 2024 nung Artists' Corner lapoktsü

**Dimapur, Yimpoksüi/Nov. 25 (TYO):** Department of Art and Culture ajanga local gallery ka den teka amteper Hornbill Festival mapang Kisama nung WW II Museum telungzük nung Artists' Corner ayongzüksü.

Iba den külemi artist tem indang art exhibition sentong alitsü.

Iba project ya local artist tem ajungkettsü asoshi lir, kong visual art inyakyim aika alitsü.

Tejangrar local artists temi pei sasa inyaktetba mapa ana Directorate of Art & Culture nem lable aser bio data den külemi office mapang November 28, 2024 tashinung agütsüsü ayongzük, ta sangdong ka ajanga ashi.

# NITI Dimapur ajanga angati NEET/JEE Mock Test ayongzük

**Dimapur, Yimpoksüi/Nov. 25 (TYO):** NITI Dimapur ajanga Class XII Science azünger kakatshir aser medical & engineering azüngtsü jangra aliba repeaters asoshi angati NEET/JEE Mock Test ayongzüksü.

Dimapur Centre, Marwari Patti, Dimapur nung November 30, 2024 nikongdang 1:00 ako nung agitsü, kong NEET aser JEE tatidang chichiba ama agitsü.

Kaketshirtem item tatidang asoshi renema asadangtsü aser tarutsü nung iba amala tatidang agütsüdang temlung ulushitsü nukjidong nung iba sentong ya ayongzük, ta Ajay Sethi, MD, NITI Academy, Dimapur ajanga sangdong ka nung ashi.

Shilem agir nem temelenshitsü tejangja agütsüsü aser ibaji ajanga parnok tashi maitba jangjatsü.

Iba tatidang ya NITI

Applicants temi asangsang nung tatidang agir ama ajangshitsü aser takotet nisung temi lenmang sayutsü. Menden kanga tataktet lir, anungji tekeraba nung registration agitsü ayongzük, ta sangdong ajanga ashi.



## Sambhal azütokshi lendong nung asür 4 jungogo



Sambhal nung Jama mosque asadangba mapang azütokshi lendong atalokba sülen anogo ka lir yimti yimtungtem azünga aliba noksa nung angur.

**New Delhi, Yimpoksüi/ November 25 (Agencies):** Hombar anepdang tashi nung Sambhal azütokshi lendong nung asür nisung 4 jungogo. District administration-i November 30 nü tashi tangalen nungi district-i shinga marutsü atema tenokdangba agütsüogo.

Court kati mosque ka asadangtsü atema tetuyuba agütsüba sülen Deobarnü lendong ataloka liasü. Iba mosque ya Hindu temple ka raksar yanglu ta shia temepishiba ka agütsüba telangzüba agütsüba mapang court-i iba tesem asadangtsü tetuyuba agüja liasü. Hindu telok atema okatsür Gopal Sharma-i ashiba agi, iba temple ya 1529 nung Mughal emperor Babur-i raksaja liasü.

Ken o dak sendakba nung Congress lenir Rahul Gandhi-i Hombar BJP-i aitsüogo aser ashiba agi parnoki tensa tamajungba küm daksür.

“Sambhal, Uttar Pradesh nung state sorkari aritepa jenjang agiba aser telok kar

pusema inyakba ajanga lendong atalokba mapang aser firing mapang asürtem den asükhu lemsateper. Telok ajak tebilemba junga mangadangi ketdangsürtemi jenjang agiba ajanga tensa tamajungba aküm aser nisung aika süogo, koba BJP sorkar khuret lir,” ta pai X nung zülutsü.

“BJP-i, Hindu aser Muslim nung tsüngda mangatettep adokdaksütsü atema parnok tashi amshiba ya state mesüra linük tejangraba ka masü. Ni Supreme Court dang takaratiba nung jenjang tapet agia ochi obendang agütsütsü mepeshir,” ta pai ashi.

Deobarnü Samajwadi Party tekolakba Akhilesh Yadav-i, iba azütokshi lendong atalokdaksütsü atema jenjang agiba asoshi BJP den state sorkar aser administration aitsüogo.

Deputy Inspector General of Police (Moradabad) Muniraj-i ashiba agi, Deobar anepdang lendong atalokba mapang nisung asem asü aser nisung ka

Hombarnü temang anepalua aliba mapang süogo.

District Magistrate Rajender Pensiya-i ashiba agi, Bharatiya Nyaya Sanhita (BNS) kübok provision balala dak ajemdaker tenokdangba agütsür lir.

“Bendanger, lokti tentet balala mesüra public representatives tem ketdangsürtem dang nungi temelaba memeshi-i district arrtsü adena aitsü memelatsü,” ta tetuyuba nung shia lir.

Azütokshi lendong dak sendakba nung FIR pezü benokogo, ta DIG Muniraj G-i ashiba den tensa tangbo azüoka lir, ta shisem.

Deobarnü Jama Masjid asadangba anema longkak aiterter aser security personnel tem mangatettep adokba sülen azütokshi lendong ya ataloka liasü. Parnoki security dak long agi aon aser gari pongu rongtokja liasü.

Iba lendong nung police aser administration personnel 24 yirua liasü. Maneni tetsür ana densema nisung 21 sota yua lir.

## Rashid-i Parliament Winter Session nung adentsü atema bail meshi

**New Delhi, Yimpoksüi/ November 25 (Agencies):** Lok Sabha MP Abdul Rashid Sheikh, shiba dang Engineer Rashid ta ajar, pai parliament Winter Session nung adentsü atema Delhi nung Patiala House Court dang interim bail meshiogo.

Engineer Rashid ya Awami Ittehad Party (AIP) tir aser lower house nung Jammu and Kashmir indang Baramullah constituency nungi lir.

Kiralongrarterem nem senotsü teyari agütsüba ken o nung Rashid ya tang judicial custody nung yua lir. Iba ken o ya National Investigation Agency (NIA)-i bushisüngdangdar.

Ken o angadanga mapang Rashid-i video conference ajanga jembu aser nüburtemi shimba lenir ka ama pa mapa inyaktsü atema interim bail nüngdaker ta ashi.

Paisa, taoba parliament

session nung medentetba atema süoki ia bilemba lemsatepba den, “ni teka mejemteper kü nem interim bail agütsütsü mepeshir,” ta ashi.

Iba ken o nung aija alir ano tangar kata video conferencing ajanga shilem agi aser inyakim mangatetba indang lemsatepba den okadaki tsüngtong arua shilem agitsü mepeshia liasü.

Kasa mapang nung Principal District aser Sessions Judge Vimal Kumar Yadav-i, NIA ken o ya tanga mapang ka nung angadangtsü atema telemtetba agiogo.

Rashid ya nüburtemi shimba lenir ka asünung NIA special court-i November 21 nü iba ken o ya MPs/MLAs tem atema amenoka aliba special court dangi abentsü benoka liasü. Court-i Patiala House Court District Judge dang iba

ken o ya iba specialised judge dangi yoktsü mepeshia metetdaksü.

Engineer Rashid ya kiralongrar nem senotsü teyari agütsüba dak sendakba nung Unlawful Activities (Prevention) Act (UAPA) kübok 2019 küm August ita apu.

Pa anema ken o benoker liaka Rashid-i 2024 küm parliamentary election nung tepuokdak nungi nomination file asü aser Baramullah nung Omar Abdullah tsükdakja liasü.

2022 küm NIA court yagi probe agency dang Engineer Rashid den Hafiz Saeed, Syed Salahuddin, Yasin Malik, Shabbir Shah, Masrat Alam, Zahoor Ahmed Watali, Bitta Karate, Aftab Ahmed Shah, Avtar Ahmed Shah, Naem Khan, aser Bashir Ahmed Butt nung anema ken o benoktsü tetuyuba agütsü.

## Adani Group-i crore 100 tenla agütsüba Telangana CM-i magizük

**New Delhi, Yimpoksüi/ November 25 (Agencies):** Young India Skill University atema Adani Group mendenbuba Gautam Adani-i sen crore 100 agütsütsü nangzükba Telangana chief minister A Revanth Reddy-i magizük.

Iba tenla agütsütsü sangdongba sülen nüngdak makaba nung sensaksem tali akümba sülen iba tenla ya nokdangtsü atema telemtetba agiogo, ta Reddy-i ashi.

“Adani-i tenla agütsütsü sandongba sülen iba tenla ya agizükra state sorkar mesüra CM atema tajangzük asütsü ta nüngdak makaba ken o tema adokba sülen iba telemtetba agiogo,” ta Reddy-i Hombarnü osangbener den sensaksemba mapang ashi

Paisa, Adani Group densema Telangana sorkari shinga dang nungi sen ka danga agizüka mali, ta ashi.

“Ni aser kü indang Cabinet-i nüngdakba makaba sensaksem nung aser state

sorkar mesüra kü noksa raksatsüsa inyakim kecha nunga shilem maginer. Ibayongji state sorkar tenüng nung ketdangsür Jayesh Ranjan-i Adani dangi shiti ka zülüogo,” ta Reddy-i ashi.

“Tang tensa aser mepetmesü adoker aliba dak ajemdaker nai tenla crore 100 agütsütsü nangzükba agizüktsü Telangana sorkar renema mali,” ta Reddy-i ashi.

Paisa, shiti nung university project atema Adani Group nungi sen agitsü asoshi sorkar tebilemba mali aser iba telok dang sen magütsütsü atema shiogo, ta metetdaksü.

Adani Group ya tang centre sorkar aser opposition na kanga sashia atsütepba onük ka kümogo.

Narendra Modi-i aniba sorkari Adani Group pusema inyakba atema Congress-i parnok aija arudar. Kasa mapang nung BJP-ia iba telok yagi opposition-i yimsü asüba state tem nung sen intokba indang tuteta shia arudar.



New Delhi nung ochi mashi ken o dak sendakba nung industrialist Gautam Adani apusü khanga Indian Congress-i longkak aitba mapang Congress pusemertem tangokba noksa nung angur.

## Delhi NCR nung school, college tem physical class tenzükshitsü asadangang: SC

**New Delhi, Yimpoksüi/ November 25 (Agencies):** Supreme Court-i Hombarnü Commission for Air Quality Management (CAQM) dang school aser educational institution tem physical class tem tenzükshitsü atema takoktsü lenmang ali malai aji asadangtsü metetdaksüogo.

“Kaketshirtem karbo mid-day meal scheme mangur mesüra online class tem nung adentsü atema facility malitsü akok mesüra kidang air purifier malitsü akok, anungji item ajak ya asadanger telemtetba ka agitsü,” ta SC-i ashi.

SC-isa, AQI tajungba kuma oa temulung masü tashi GRAP-4 inyakimtem tajemba mekümdaksütsü ta ashiba den, Delhi indang AQI figure Bodhbarnü tashi indang meshiogo, ta shisem.

Okadak iba ken o ya ano Bodhbarnü angadangtsü.

Supreme Court-i, CAQM dang anogoshia aayangertem nem teyari agütsütsü atema asadangtsü tuyuba den state tem dang kisüjensütsü nokdang aliba mapang

subsistence allowance agütsütsü tetuyuba agütsüogo.

Linük yimtiba nung mopung jenjang ya Hombarnü tera tajungba kuma tang ‘poor’ jenjang nung lir. Hombar anepdang 9 ako tashi nung linük yimtiba indang Air Quality Index (AQI) 281 liasü, koba Deobarnü nikongtsütsü 4 ako tashi nung 318 liasü.

AQI 0 nungi 50 tashi ya ‘good’ ta züngshir, 51 nungi 100 ‘satisfactory’, 101 nungi 200 ‘moderate’, 201 nungi 300 ‘poor’, 301 nungi 400 ‘very poor’, aser 401 nungi 500 ‘severe’ ta züngshir.

Ajisüaka Delhi nungi monitoring stations 39 nungi 15 nungbo AQI ji ‘very poor’ jenjang nung aliba mangaoka lir. Shadipur nung AQI tamajungtiba (353) liasü.

Delhi sorkari linük yimtibai truck tem aitba dak sendakba nung anti-pollution GRAP-4 tenokdangba magütsüba atema taoba hopta Supreme Court-i Delhi sorkar aitsüogo aser tangsa tang entry points 113 amenoktsü atema tetuyuba agüja liasü.





## TIR YIMYIM YIMOBILEM (EDITORIAL)

DIMAPUR SANGTENNÜ, NOVEMBER (YIMPOKSÜI) 26, 2024

### Nagaland-i raliwalirtem arutsü

**T**anü putu tasenba nung Nagaland government-i tenzükba benjong, Hornbill Festival, tenzüksü joko anogo pungo nü dang lir, anungji alima tesem balala nungi raliwalirtem tanü asüngka nungi aru tenzüksü. Iba benjong yabo Naga nung benjongsa süaka aluyimertemi tenzükba masü saka office nung mapa inyakertemi tenzükba benjong asünungji, tanga benjong ama aluyimba denbo sentaktepa mali saka Naga nung ajak tesem ka nung adenshia pei pei sobaliba yar tsüngsang, saisapong aser kentenmenü ia sayutepba aser chia-jema longsutepba benjong ka lir. Atangji, iba benjong yabo, tanga benjong amato lalushiponga amongba benjong masü saka tangar dang nungi senotsü tajangzük angutsü tebilemba aser teimla nung ayongzükba benjong ka lir. Iba nükjidong nung iba benjongi arudaktsütsü asoshi sentong tajung tapu balala yanglur alima nem metetdaksür aser itemji reprangnua alima tesem balala nungi raliwalirtem arua amonger. Aji oda, asenok asoshibo kechiba hornbill benjong ya amonger (?) ta asüba dang nungibo kechiba asen limai raliwalirtem arudaktsüner (?) ta asüba tasüngdangba nung telangzüba bushitet nungang tajangzük angutsü. Atangji, tamangba tsütsü hornbill benjong amongba ya reprangdangra, iba hornbill benjong ya Khristan-temi amongba benjongbo memesük, kechiyong iba benjong ya yi talubo jemtepa japujaritepba benjong ka kümogo. Aji oda, Kisama nungbo Tsüngrema mali ama Naga nungertemi amonger. Ibjiang, asenoki melenshitetsüla, kechiyong yi mejemia Hornbill benjong ya mongtettsü aser raliwalirtemji yi ajemtsü atema Nagaland bushia arur masü saka Naga lima aser Naga nung sobaliba reprangtsü aser angazüksü arur. Aji oda, asenoki asen limai raliwalirtem arudaktsünua sentong atongba nükjidongji parnoki bener aruba senji asenoki aazüka yuner. Tanga limaji khenyutsür küm shia mapang balala nung alima tesem balala nungi Israel lima repranga jajatsü atema raliwalir lakh 50 shii semdang. Anungji, item raliwalir lakh 50 Israel lima yimti balala nung anena chiyongba, parnok anir jajar nisungtem (tourist guides) aser gari nem agütsüba sen aser parnoki osettsüset aser süoshi tapu balala alia bener aoba sen ajakji Israel nung keti aoer. Iba denji Israel nung aika government mapa dang nungi tajungba mapa ngua ayanger aser item nung jagi alimelen agiba agi government senponga melemer. Iba amaji asen lima nunga raliwalirtem aruba nungi asenoka mapa angutsüla aser senotsü ajangzüksüla. Raliwalirtem yabo talitsü arur masü saka khen monger meyipa aotsü purtem lir, anungji parnokji asenok nem sen agütsür aotsü aruba purtem lir. Hornbill mapang nung ya item nung jagi, talisa, Kohima nung alirtembo sen aika aar. Aji oda, iba tajangzükji Kohima nungji dang metembangdaksüi Nagaland tesem balalai bener otettsüla. Ijabi tangari inyaksütsü matai district shia peisasa apiteta inyaksü nungdaker. Atangji, Kisama nung hornbill benjong dang masü saka Kohima aser temeket nung raliwalirtemi reprangnüsüsa tesem aika lir. Kasaji Nagaland ajaklen tenem, ayong, longren, longpok aser nisungtemi yangluba tereprangnüsü tesem aika lir. Itemji asenoki otsü keta wazüka yutettsüla aser tangari metettsüsa asenoki inyaktettsüla. Atangji, item ama mapaji jangrayonga ajakibo meinyaktettsü saka asenok alidak 'Eco Tourism Club' mesüra 'District Tourism Association' ama tenteta yimtsüng ka dang masü saka district ajak agi 'District Tourism Map' kuma yanglur asenoki Kisamai arur raliwalirtemji asen limaia arunüsüsa inyaktetra asenoka Kohima nung alirtemi anguba kasa tajangzükji angutsü. Asenok dak mekokmein aser mashimalu kaji asenoki raliwalirtem arudaktsütsü asoshi "Tourism" sentong nung government nungi teyari agia meinyakteter aser kar inyakbajia raliwalirtem, tourists, asoshi nungdaksüsa masü saka sen tera agir yutsütsüba mapatem dang inyaker. Itemji asenoki asenoksasa ashioksüba mapatem lir. Iba ama tokolok tila aser tangatetba temesü nungi asenoksasa salatettsüla aser Nagaland ajunga ya Kisama ama kumdaktsütsüsa asenoki inyaktettsüla.

## OLEMSABANG

### NLTP ACT: KECHI NUNG TAMAKOK?

~ Rev. Dr. N. Lipok Jamir, Pastor,  
Ao Baptist Church, Diphupar

**Yi ajemba ya tajung asü tamajung?** Laishiba nung yi khenyongi majemtsü, mamshitsü indang shia mali, saka yi ajemba, yi agi mesepba ajanga kija taküm nung, kibong nung aser lokti nung teraksa jenti bener arutsüba, tebilemstsü tulu sentaka aliba indang dang jenti shia angutsü. **Atangji**, yi agi mesepba ya balaka jangja anguba temenen ka lir.

Nai yiji miima ajemtsü akok saka iba jagi mesepra miimshitsü lenmang mali. Kechiaser nüksak melenshitsü, indangindanga merangloktettsü, osü melenshitsü, lenmang tiyong nung jajatsü tasak akümstsü, aser indangindanga menokdaktettsü, ano tanga aika (a.t.a) lir. Laishiba nung yi aser yi agi mesepba dak sentaka aliba tesempatsü temenen indang jenti shia lir. Tongtibang kar shisemdi:

*"Kodang pai (Adam) iba yi ajem, pa mesepadok aser pei süki nung mangsa ontaka ali" (Lipok 9:21); "Yi pur rongnung...teli. Kechiyong yi purji...sensak tiai aitsü..." (A. Shin 23:20-21); "Tatem nung yagi (yi) per-i ama meteper, aser mim per-i ama mechir." (A. Shin 23:32); "...yi aser yi lanu agi tangatetba bener oadoker" (Hosea 4:11); "...yi agi mesepba purtem...yamala shinga Tsüngrem Yimli senmang mangutsü" (I Korint 6:10); "Aser yi koba nung teraratsü lir, aji agi temesep ma, saka tanela agi sünga liang" (Efesa 5:18).*

Atangji, yi aser yi agi mesepba nung tajung kecha sentaka mali. Aji asünung akhi putu nungi Ao lima nung yi anema jembia aru, yi anema raraa aru. Kuli kar shidi:

Naga lima British nungeri yimsü asüba mapang Rev. Kijung nem P. Adam saab, Mkg SDO ajanga tzüla atena sayutsüngi maotsü January 3, 1939 ozüng agütsü. Angazükba agi sayutsüngitsüba dang masü yi tejem ta mashitsü ozüng agütsü. Tetezü yi tenokdang ta ozüng agütsü. Saka Rev. Kijung den tsürabur Semsalepzüng tenati tzüla atena or Sangtam lima nung Yisu Osangtajung den yi majemtsü indang sayutsüngi (*otsü talangka lir*); ibaji ajanga April 6, 1939 küm nisung 104 Rev. Kijung-i tzü nung baptitsü.

Saka Saab nunger ozüng anema inyak asünung senchi sen 50 meshia shiti aru. Iba senchi agütsütepba mapang yamai jembia asü, kodaser Tzüla atena ao? Semsalepzüng-i *"saab nabo England lima talang nungi arur ozü lima nung onok madak yimsü asür ato, saka Sangtam limaji ozü lima ato"* ta langzük ta ashir. Ano kodaser yi majemtsü tejembi ta ashi nung yi tejem ta ashi? Saab nabo yi ajemerji naibo yiji jemang ta shiang, saka künabo majemerji onokibo tejem ta ashia ta langzük ta ashir. Iba ya yi anema mezüng raraba mesüra, Naga lima nung mezüngbuba yi tongpang rara liasü (1930s).

Naga nüchiso movement tenzüker külen GOI-i Naga lima dangi Yimten Yi (*Political Rum*) ta ser talubosa yok. Anungji NBCC-i Feb. 5, 1962 Mokokchung nung senden alidang iba Political Rum yoktsü melenji nübur asoshi mapa tajung ang ka melena inyakang ta mepishi. Yongji, aji anen.

Naga nung Statehood ngur külen 1964 nung NBCC-i Kenneth Kerhuo, Rev. Ayutemjem and Rev. Longri Ao nung lenisüba nung Nagaland Government dang yi ayokba ya anenjang ta ashi. Saka sorkari yi ayoktsü temelaba (license) tali ang agütsü aser yi ayokdak district ajak nung teimba lapok. Anungji October 2, 1966 küm NBCC-i Chief Minister aser pa kübok minister-tem dang yi ayokba temelaba kuli (licenses) agientsü aser dokan ajak shibangjang ta ashi. Sorkar hai ta langzük saka ano meyiper Nagaland Government-i yi yanglutsü, ayoktsü aser amshitsü ang ozüng yanglu, aji 1967 küm (the Nagaland Excise Act 1967 to manufacture, sell and use more liquor).

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Ukraine amakba anema jembiba mechi Russian pastor ka apu

Moscow, Yimpoksüi/Nov. 25 (Agencies): Russia-i Ukraine amakba aitsüba aser tamangertem dang iba rara nung shilem magitsü ajungshiba sülen Russia nunger pastor ka apu.

Ukraine nung tang teraradak mapang ketdangsür aitsür merenshitsü ozüng yangluba kübok tamangba yimsü tsütsü lenir mezüng apubaji Moscow Region nung aliba Holy Trinity Pentecostal Church nung senior pastor Nikolay Romanyuk ya alitsü, ta Norway nung amenoka aliba human rights watchdog Forum 18 ajanga ashi.

State security anema yimjak nung ola adokba dak tenük yoker yangluba ozüng kübok apusang Pastor Romanyuk ya Moscow nungi anüdoklen kilometre 50 shi pilar Noginsk nung aliba Investigation Prison No. 11 nung pua yua lir.

October 18 anepdang sepaitem arua par ki aser ano arogo züngsem kar ki meita aoba sülen bushisüngdangertemi pastor ya apu. Anogo ana lir obendanger kati pa ita ana pua ayutsü totuyuba agütsü.

Ketdangsür temi bushisüngdangba ya Romanyuk-i September 2022 nung Tsüngrem o jembidang Laishiba tesayuba nung ajemdaker tamangertem Ukraine nung raratsü atema maotsüla ta ashiba asoshi lir.

Iba sentong ya livestream süa liasü aser iba sülen arogo indang YouTube channel nunga upload asü, aser iba yongji Criminal Code Article 280.4, Part 2, Paragraph V kübok ken o benok, kong mass media

mesüra internet amshia Russian Federation indang security anema jembiba indang shia lir. Iba ken o nung pa aitsüra tepuokdak küm trok tashi ayutsü mesüra senchi sen Roubles million ka (\$9,600 shi) achitsü, koba Moscow nung ita tenet indang taa (average) den sako lir.

Koba state agency ajanga meita ao mesüra ken o ya benokar mejangja, ta Forum 18 yagi ashir, aser parnoki Federal Investigative Committee, Moscow Region Investigative Committee aser Federal Security Service densema kongsang balala dangi Rimanyuk-i jembiba ajanga komasür state security nung timtem agütsür aser kechiba prangbong bener arua meita aotsüsa akum ta tasüngdangba yoka lir. Ajsüaka tang tashi item kongsang kata nungia telangzüba agüja mali.

Holy Trinity Pentecostal Church ya 'registered religious organization' la lir aser iba dak nungi jakzüka arogo aika Moscow aser temeket region nung lir.

Iba operations ya kanga sashia agia ki karbo tashiyim agi kakboka ai, digital osettem apu aser item ki nung alirtem prangbong agi tuitter ali nung mejangdaksü ta osang ajanga ashir.

Romanyuk meteta alir Ukrainian pastor Vladimir Franchuk-i blog post ka nung "Tanü kibong ajunga kanga sashia aoksadaksüogo, saka modern Russia nung iba ama ki o jen meita bushia aser apuba ya takzüteter aser imla liasü – koba tesasatsüka lir," ta zülü.

2022 küm September ita Romanyuk-i Tsüngrem o jembidang, "Kodang dangar dak azüksü ashir, kodang nü nemyi bottle ka agütsür, mesüra tongpang-i yoktsü na ajar – ibai kasa temenen, kasa mozü, aser kasa Satan lir. Asenoki tongpang nung shilem agitsü Tejen Lai nung shia aliba kü dang sayuang. Ibai asen rara masü," ta shia liasü.

"Asen tesayuba nung asenok ya pacifists ta zülü lir aser asenoki shilem magitsüla. Temeshi Lai nung ajemdaker asenoki ibai jembitsü asen temeden lir. Rarai aortem nem asenoki temoatsü magütsür. Tashiyim agi anir aortem asenoki memoatsür, saka tongpang nungi parnok kumzüksü atema sarasademtsür."

Dangar tamangba yimsü tsütsü lenirtema iba ama tai tonglokja lir.

Item rongnung Moscow Zen Centre tenzüksang aser director Ilya Vasilyev ya ka lir, shiba Russian Armed Forces indang osang tiazü prokshi ta tai tonglokja December 3 nü okadak ken o jembitsü lir.

Ukrainian Greek Catholic Church nungi putir ana, Redemptorist Fathers Ivan Levytsky aser Bohdan Geleta ya Russia nungeri ita 19 tepuokdak yur tepuokdak alirtem melentepba mapang June ita chioka liasü, kong Vatican densema linük balala ketdangsür temi shilem agia liasü.

Putir tem tepuokdak lia teti merenshiba osangtem taoksatsüka lir, ta arogo lenir kati ashi.

## ANOGO ABEN TSÜNGREM DEN

### Lenisüba Tanela - Yohan 14:14-26

"Ochi Tanelai nenok ajak ochiba dangi anitsü."

Yohan 16:13

Tanabuba tangatetba tanelaji, Tanela Temeshi Kibuba Yisui Tanela Temeshiji asenok Teyarir aser Lenir ta metetdaksü. Pai asenok ochiba dangi anitsü. (Yn. 16:13).

Tanela Temeshiji tamanger shia dak alir aser tzüra temdaksür. Kodang tesayuba Tsüngrem nungi mesüli idakji jangratem aser tipdem ka malitsü. Iba indang tenyar Yohani tejangja ashi. "Shirnoki nenok mashileni anisar, parnok indang ni item o nenok dangi zülüogo. Pa nungi nenoki kechi mezüja shimtetba angu, aji nenok dak alinung, kari nenok dang sayutsü, aji nenok tenügdaksü maka. Saka Pai mezüja shimtetba jagi kechisarena indang nenok dang sayu nung, aser aji ochi asünung, tiyazü masü, aser aji agi nenok dang koda sayu, aji oda nenok dak liang" (1 Yn. 2:26,27). Iba osang yagi arogo nung tamangertem aintsü sayuba indang mashir (Ef. 4:11-13). Saka arogo nung tiyazü tesayurtem, shirnoki na ashioksütsü meranger parnok indang jembir.

Tanela Temeshi asenok nem tiyazü tesayuba anema tekümdangtsü agütsür (1 Tim. 4:1). Tamanger kari tiyazü tesayuba kar mesüra jungkai adokba kar Khristan telok nung amshitsü merangdir pai Tanela Temeshi jashidaksüra! Pai "tatok makaba temenen" menar! Iba yagi Lucifer nem masadangtetba maongka agütsür. Tanela Temeshiji ochi tanela, anungji tiyazü tesayuba agi pa peladaksütsü makok.

Pauli 1 Tesalonikia 5:19-22 nung Tanela remsepdaksüba mapa asem sayur.

- 1) Sayutsüngiba mezüngmeshi masütsü
- 2) Ajak tendanger tajungba ametang
- 3) Tamajung kechisarena nung pilaa liang.

Tesalonika arogo nung Grik nunger süngyanglu külemba yimya tesayuba kar lir ta Pauli putet (Tesa. 3:5). Junga mangateti sayutsüngiba ajanga Asentenshi sayutsüngidang sayutsüngiri mezüngbuba onük nungji aibelener.

Metendangi agizükba aser tamajung nungi pilaa maliba jagi ajemaluba Tsüngrem Tanela tali jashidaksüra, aser asenok dak aliba Tanelaji remsemdaksür, tangar tanelatem ajak sakdaksür. Tanela Temeshi-i ola matoki tangar tanelatem inyakba ajia dangbo malitsü. Pa tenük meyiba Tanela lir!

Tanela Temeshi arung, kechiaser Na ajanga ainkartemi zülü aser jembir, ochiji lapokang, Na sapi lir, Temeshi Kaketji lapokang! (Charles Wesley, 1707-1788).

### Yisu yimya

"Nisungi kecha südanga Tsüngrem tenük agi mangu. Saka Yisubo yamaji masü!"

Pa asenok rongnung ka aküm, aser pai asen nüngdak ajak meteta lir. Yisu timatempa aser asüba nung asenok pa den ka akümtsü tasak masü. Saka kodang aseni pai tasüba madak takok anguba shisadangdir Pa asenok ama masü. Pa Tsüngrem lir! Pa dak Taküm aser tasü madak tashi lir. Aser iba tashi jagi Yisuji Tsüngrem ta jungkai adoktsü!

Anungji asen Taküm nung Yisu aser Pa tenzükba tetezüji kechi? Ibai asen taküm, jakla aser tia den apet asü masü? Atangji Yisu mapaji tekümtet mapa asü masü?

Yisu mapa aser taküm tanü asenok mapang den tapet asü masü? Pai asenok dang Tsüngrem aser pa dangi arutsüba apuji sayur. Pa mapaji Tebu Tsüngremi asenok asoshi teti tekumtet agütsüba mapa lir. Pa mapa ajanga asenoki Tsüngremi pa temeim asenok dang sayuba, alangzükba, aser taküm sotba metetter. Saka Tsüngrem tenüng sangdi, pa Tsüngrem ama masü, nisung rongnung ka lir.

## Assam Magical Healing Act kübok pastor ka apu

Guwahati, Yimpoksüi/Nov. 25 (Agencies): Tawa renemba Assam Magical Healing (Prevention of Evil Practices) Act, 2024 kübok Assam Police ajanga Upper Assam



nung Golaghat district kübok Khristan pastor ka Hokulbarnü apu, koba iba act kübok mezüngbuba alitsü.

Pastor Pranjal Bhuyan ya Dergaon police station kübok Padmapur nung alir aser pai dangartem Khristan yimsü agizüksü asoshi puatsü mechi "magical healing practices" (taneptsü agütsüba yimya) amshi ta tai tonglokja lir.

Pastor Bhuyan ya Golaghat indang Chief Judicial magistrate indang court dangi Honibarnü anir aru aser anogo 14 atema judicial custody nung yua lir.

Yisu Khrista dang sarasademba ajanga shiranger

aneptsür ta pastor yagi nüburtem timtem nung aliba maongka amshir, ta Padmapur nung alirtem ashishiba sülen pa apu. Tamangba yimsü melendaksütsü mechi Bhuyani item yimya ya amshir ta ashishirtemi tai tongloktsü.

Anungji police temi Assam Magical Healing (Prevention of Evil Practices) Act, 2024 indang Section 6(a) aser BNS indang Section 316(2), 318(2), 354 aser 299 kübok ken o ka benok.

Nisung mashi lenmangi anisatsü tebilemba nung "magical healing" yimya amshiba Assam Magical Healing (Prevention of Evil

Practices) Act. 2024 ajanga aitsür. Iba Act nung iba ama yimya amshiba ya bail magütsüba aibelen ka lir aser temerenshi ya küm ka nungi asem tashi tepuokdak ayutsü, senchi sen 50,000 tashi achitsü mesüra temerenshi anaprong alitsü shia lir.

Sempet balala mesüra tamangba yimsü tsütsü nungi taneptsü agütsür ta tenüng amer nüburtem mashi lenmangi aniba nungi kumzüka ayutsü nükjidong nung iba ozüng ya yanglu.

Iba Act mapa kuma amshi tenzükba iba ken o ya mezüngbuba alitsü. Iba tatalokba yagi tamangba yimsü temeden, anti-conversion laws, aser tanüla mesüra tamangba yimsü nung ajemdaker yimba balala amshiba atema ozüng yanglua aliba nung o intep tenzüksü amai ajiteter.



AO OSHI ANGAZÜKDAK:

TANÜ ANGAZÜKTSÜBA OJANG



Tashir

(n) temeteter (knowledgeable person)

\* Tashir maliba agi ken o angazükdak maka akümer.

Tashirep

(adj) tamajung küma kongrepba (shrivelled)

\*Süngjang ajak ali nung tsüka tashirep kümer liasü.

OLONG PAITEP # 6993

Grid for crossword puzzle #6993 with numbers 1-16 indicating starting positions.

TIPILEN

- 2. Auonung chiyongsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A \_ \_ \_ g
6. Mopung apodoka
9. Tongtipang tagitsü
10. Menungra bilem
11. Aiür
13. S \_ \_ \_ k
14. T \_ \_ \_ r

OLONG PAITEP # 6992 TELANGZÜBA

TIPILEN :

- 1. Tesangra, 5. Mungo, 7. Kisen, 8. Salem, 12. Semki, 14. Kilem, 15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon, 4. Aso, 6. Nile, 9. Alizüng, 10. Omen, 11. Lemta, 13. Ola, 14. Kin.

NAI-A YA METETTER MA



Game of Thrones nung "The Mountain" shilem agir Hafþór Júlíus Björnsson-i record tasen ka yangluogo. Atlanta nung SC24 conference mapang Björnsson-i solid-state storage 282.624 petabytes tashi ajungketba ajanga "deadlift of data" record yanglutet. Iba petabytes ya 996 pounds taret liasü aser iba nung reinforced metal bar, silver dollar boxes aser Phison'er Pascari D205V PCIe Gen5 122.88TB solid-state drives dena liasü.

Assamese nungeri US nung classical language atema benjungtep



Guwahati, November 25, 2024 (Agencies): India nung classical language ka ama Assamese language agizükba atema United States nung November 21 nü Assamese Diaspora-i benjungtepogo.

Embassy of India, Washington, DC nung Assamese sobaliba, senmang aser Assamese oshi ajanga linük nung shilem agiba atema sentong ka ayonga agi. Iba sentong ya Embassy of India, Washington, DC, aser Maryland, USA nung social worker Anjana Bordoloi yaritepa ayongzük.

Iba sentong nung Washington, DC, Maryland, aser Virginia nungi Assamese nung aser tangartem aden. Iba sentong nung First Secretary (Press, Information & Culture) of the Embassy of India Neha Singh-i o okila jembi.

"Assamese nung asüba atema onok nüma atanger. Iba ya Assamese oshi agizükba dang masü saka Assamese oshi aser sobaliba wazüka ayutsü aser ajungketsü atema anibelega inyakertem ajitetba mapang ka lir" ta entrepreneur & community leader Anjana

Bordoloi-i ashi.

Laisa Prime Minister Narendra Modi aser Chief Minister Himanta Biswa Sarma lenisüba kübok Assam sorkar-i Assamese oshi nem classical language status agütsüba atema pelar ta lai ashi.

Iba sentong nung Embassy ketdangsürtem- Jigar Raval (First Secretary (ITOU)), Rajiv Ahuja (Second Secretary (Visa), Ravish Kumar (Second Secretary (Press, Information & Culture), aser Aditi Walunj (First Secretary (Education & Science & Technology) nung aden.

Assam Police-i NH-17 nung bus gari anishirtem dak tenük yoker

Guwahati, November 25, 2024 (Agencies): Assam kübok National Highway-17 nung passenger bus garitem mashii anishiba ajanga lendong balala atalokba sülen police-i mita anüksü tenzükogo.

Goalpara nung tesüba ita ishika passenger bus garitem ajanga lendong balala ataloka aru. Iba lenmang ya kanga talangka asüba agi bus garitem senzüba junga mita mereprangi dang aru.

Jogighopa Police Station nungi traffic police-i bus gari ajak mita reprangtsü tenzükogo aser traffic & safety rules alema senzürtem dak senchi chiogo.

Gari kanga kara aniba, mashii aniba aser passengers o khu talila anir senzüba mita repranger.

November 16 nü Goalpara kübok Rangjuli nung gari ka bus den tsüktepdang nisung 3 asü. Iba bus gari ya mashii aniba

aser lane disciplines sülen manidakba ajanga lendong atalok ta tai tonglokja liasü.

Taoba hopta iba mesükba lendong ka nung tebu o jala na asü. Kasa lenmang nung tena amenba gari dak bus kati atsük.

Iba lendong atalokba sülen tejashi nung nisungtemi bus gari nung mi senokja rongdoktsü.

Gar lendong teimba ka meimchir aibelenba ajanga ataloker anungji akangakanga mita anüksü ta police-i shiogo.

Manipur kübok Jiribam nung sepaitemi bunkers aika raksatsü

Imphal, November 25, 2024 (Agencies): Manipur kübok Jiribam district nung sepaitemi telungpurtemi amshiba bunkers asem aser tesepe kar raksatsüogo. Parnokisa Kangpokpi nung prangpong-injang aika ngutetogo.

Deobarnü Jiribam district

kübok Mongbung, Zairawn, Balijuri aser Kashimpur nung telungpurtem indang bunkers aser teseptem raksatsü.

Central paramilitary forces aser Manipur state police külemi inyaka aodang HE 36 grenade ka angu ta osang angazüker.

Ajisüaka bunkers nung

jenoka aliba telungpurtemi prangpong-injang ajak bener jena orr liasü.

Kangpokpi district kübok Longajang area nung sepaitemi .303 rifle ka, single-barrel breech loading (SBBL) ka, 9mm pistols ana, long-range mortar ammunition aser tanga osettem angu.

GOVERNMENT OF NAGALAND OFFICE OF THE DIRECTOR GENERAL HOME GUARDS, CIVIL DEFENCE & STATE DISASTER RESPONSE FORCE NAGALAND : KOHIMA.

NOTICE

Dated, Kohima the 25 th Nov' 2024

NO.HG/ESTT(A)-3/2021/2057 : This is to notify that the medical fitness test, proficiency test and interview for appointment to the post of 1 (one) carpenter is postponed till further notice.

Sd/-

RENCHAMO P. KIKON, IPS DIRECTOR GENERAL.



Molungnen O



LATE N. IMTI IMSONG

JULY 24, 1942 - NOVEMBER 11, 2024

Ozü temeim tsürabur N. IMTI IMSONG (Wameken) iba akümlir wadang tempanger November 11, 2024 anogo nung Kibuba dangi ogo. Pa asüko mapang shirnokisa onok dang aria bilema maparen ajak nung tatem tashi yariogo, nenok ajak dang kanga pelar. Tulusang Tsüngremi nenok ajak moajangma!

Temeim Kinungtsü, Chirnurtem, Semchirtem aser Kinungertem

Mulungnen O



Asür Mrs Rongsensangla Jamir

9th May 1960 - 18th Nov. 2024

Onoki teti meima aliba kinungtsü aser Ojala Rongsensangla Jamir (Changtongya) akümlir wadang tembanger iba lima toktsür aoba mapang shirokisa nübu, rongsen, shisatsü aser sarasadem agi yariogo, nenok ajak dang pelaba lemsateper. Nenok mapa tajung asoshi temoatsür Tsüngremi moajangma ta ozü sarasadem.

~ Temeim Kinungbu, Jabaso, Tenu, aser Kinungertem.

Office of the MONGSENYIMTI SENSO MUNG DANG B.P.O MONGSENYIMTI P.O. CHUCHUYI MLANG DIST. MOKOKCHUNG NAGALAND-798614

KHONANG TETUSHI YIMYIM

Tsüngrem akhümtsü bua ajemalu shisa dener pei ataba wadang nung nendak-nendak inyakba maong nung takotet Mongsenyimti Senso tajung anati sorkar tenzükba nung temaba jenjang ajangzük teta sensosanger ajak nem khonang tulu bentsür aruba nungtem nung sensosanger inti tenüng nung Mongsenyimti Senso Mung dang Mendendi ajanga kanga nümadanga lenir ana nem pelaba ayimoktsür;

- 1. Wb. Imtimeren NPS, SP (Modernisation)
2. Wb. S.O.Meren, Registrar DH& FW.

Tsüngrem taochi nung asen Naga nübur asoshi tetemsü khunendong tajung kaka kümteta pei shihtah wadang nung takok ngua tenzüktsü Mongsenyimti senso ajaki sarasademtsür.

Sd/- IMOTONG President, MSM Sd/- S.NOKINLEMBBA Secretary, MSM

Hezbollah-i Israel nung rockets aika khaloktsü

Tel Aviv, Yimpoksüi/Nov. 25 (Agencies): Hezbollah-i Lebanon nungi arütsü alema rockets 250 shi khaloktsü ta Israel mitkari ashir, koba September ita nungi rara tesashiba akumba sülen Israel dak bomb timtiba khaloktsüba rongnung ka alitsü.

Northern aser central Israel nung nisung aika yiru aser ki aika raksatsü, aser kar Tel Aviv anasa khaloktsü, ta Israel indang police-i ashi. Honibarnü central Beirut nung Israel-i tayimtsü amshia amakba sülen Deobarnü iba ya ataloker. Israel-i amakdang nisung 29 tepset ta Lebanese health ministry ajanga ashir. (Maneni tapak 8 nung...)

Pakistan nung Khan pusemer 4,000 dak tema sota yuogo

Islamabad, Yimpoksüi/November 25 (Agencies): Tepuokdak yua aliba taoba Ato Kilonser Imran Khan chiocksü, aser tang linük sorkar anentsü khanga longkak aitba sentong ka ayongzüka magi tsüngda Pakistan yimtiba maneni mokdang lir aser police-i Khan pusemer meyirejang aika sota yuogo.

Anütoklen aliba Punjab province nung security ketdangsür Shahid Nawaz-i Hombarnü ashiba agi, police-i parlamentarian pongu densema Khan pusemer 4000 dak tema sota yuogo.

Osangbener den sensaksemba mapang Interior Minister Mohsin Naqvi-i ashiba agi, Khan pusemertem Islamabad kübok Red Zone tonga arura ano nisung timba aputsü, koba sorkar kitem kümzüka ayutsü atema kanga junga nokdanga yur lir.

“Shibasa iba tesem tonga arudir parnok ajak aputsü,” ta pai ashi.

Naqvi-isa, kiojen balala kümzüka ayutsü atema security dak sendakba nung jenjang tapet agiogo, ta ashiba den nüburtem aser shishilemba balala minprongba atema Khan’er Pakistan Tehreek-e-Insaf (PTI) party aitsüogo.

Hombarnü Khan pusemer noklang aikati atemteter aliba ama Islamabad-i longka aita aotsü tenzüka liasü, aser linük yimtiba arrtsü tonga oa liasü, ta ketdangsürtem aser par party-i metetdaksü.

Social media nung lemsatepba video tem nung Khan pusemertemi lokti ajungmesoa tejakdangi aotsü mepeshiba nguogo. Kasa mapang nung garia noklang aika linük yimtiba leni aoba nguogo. Peshawar nung Khan

pusemertem benjungtepogo aser garitem Islamabad-i apusoa aoba mapang PTI kübok inyakertemi parnok lenir indang noksa bener asem tema tsüngsangtepa liasü.

Khan kinungtsü Bushra Bibi aser Khan nem teyari agütsür aser Khyber Pakhtunkhwa province chief minister Ali Amin Gandapur nati anir longkak aiterem Deobar aonung Islamabad arrtsü tonga liasü, ta PTI-i ashi.

Khan ya küm ka dak tema tepuokdak yua lir aser pa anema ken o 150 dak tema benoker lir.

Ajisüaka pa ya taoba mapang ama tanga kanga nungtugu lir aser par party-i pa anema benokba ken o tem ya yimden yisüsüba dak sendaka lir, ta shia arudar.

Khan pusemertem Islamabad tonga marudaksütsü atema ketdangsürtemi shipping container tem amshia Islamabad nokdangogo, aser PTI pur kanga akanga aliba Punjab aser northwestern Khyber Pakhtunkhwa province aser linük yimtiba sendaktepba lenmang aser highway tongtibangtem ajak amai Honibarnü nungi shibanga yau lir.

Iba longkak aitba sentong ya Khan-i “final call” ta shiogo koba par party-i pa chiokdaksütsü atema ayongzüka aruba rongnung ka lir.

Par party-i tatemsa October ita Islamabad nung longkak aitba sentong ka ayonzüka agi, koba azütokshi lendong ataloker tembanga liasü.

Deobarnü Pakistan sorkari security dak sendakba nung tetsükdaksü adoktsü akok ta bilemba tesemtem nung mobile

aser internet service tem shibangja liasü.

Ajisüaka interior minister Naqvi-i, parnoki mobile phone services bo shibanga metoktsü ta ashiba den parnoki mobile data dang shibangaja liasü, ta shisem.

Kasa mapang nung telecom company Nayatel-i, mobile phone service shibangtsür aliba tesemtem nung customer tem nem landline service ka amshitsü atema maongka agütsüba indang email yoka liasü.

Khan pusemertem, pa chiokdaksütsü atema takhangba agütsütsü asoshi social media dak metaloker alir aser WhatsApp amala messaging platforms tem sentong balala indang osang tejangja densema tanga osang balala lemsateptsü atema amshir.

Ajisüaka sorkari social media balala atema tenokdangba agütsüdar aser virtual private network (VPN) services daka rangloker inyakdar, ta internet advocacy group Netblocks-i ashi.

Kasa mapang nung Islamabad nung United States Embassy-i, linük yimtiba nung aliba America nungertem dang kümdanga alitsü atema tetuyuba agütsüogo aser lokti tulu adenshia aliba tesemi takok tashi maotsü ajungshiba den yimjung nung longkak aitba sentongtem azütokshi lendong tulu kümatoktsü akok ta shiogo.

2022 küm Pakistan military den mangatetep adokba sülen Khan ya Ato Kilonser mapa nungi atsüngtoka liasü.

Pakistan nung yimden yimsüsüba nung military-i tongtibang shilem agir aser aiben linük shibai yimsü asütsü aji parnoki shimer.

Marine Le Pen-i France sorkar chirepdaksütsü amokmeren

Paris, Yimpoksüi/Nov. 25 (Agencies): Hombarnü France nung far-right lenir Marine Le Pen-i budget mechi mangatetep adoka aliba asoshi Ato Kilonser Michel Barnier indang sorkar chirepdaksütsü no confidence motion bhukuma nokdaksü ta amokmeren.

Taküm meyi mapang election agiba sülen Tir Emmanuel Macron-i shimba minority sorkar nung right-wing nungi Barnier ya ato kilonser akum, saka budget yangluba nung mangatetep adoka parliament-i ano magizüki lir.

Opposition temi iba budget ya magizüker, anungji Barnier-i constitution indang Article 49.3 amshitsü asadanger, koba ajanga sorkari parliament nung vote magitepi legislation amshir. Ajisüaka yamaji inyakra Le

Pen’er far right National Rally (RN) ya parliament nung left-wing bloc den alliance yanglutsüsa akumtsü aser confidence vote ka ajanga sorkar chirepdaksütsü nungdakba vote angutsü.

Le Pen ya France ato kilonser aloba Matignon kidangi senden ka ameni ao aser nikongdang ano hard left France Unbowed (LFI) parliamentary party leader Mathilde Panot aotsü lir.

“Kü jenjang memelenshi. Ato kilonser-i pa jenjanga memelenshi,” ta Le Pen-i Barnier den senden amenba sülen ashi.

RN-i no confidence motion yaritsü asü ta asüngdang dang, “Hao yaritsü,” ta lai langzü.

Budget magizükba ajanga timtem ajurutsü südi ta

nüburtemi jembiba Le Pen-i magizük aser yamaji jembiba nung lai mamanger ta ashi.

Ano tensa tali tebenjaba akumtsüsa France indang constitution nung legislative elections tetsüngta nung küm ka alitsü shia lir, tetetzü meyi matong tashi Macron-i election mayongzük tetsü.

“Michel Barnier-i vote of no confidence agitsüsa tensa adokdaksür,” ta RN deputy leader Sebastien Chenu-i Deobarnü shia liasü.

Ajisüaka iba mera ajanga France paralyse kumdaksütsü akok aser Macron asoshi ano mera kar lir aser yangji pa kümsük 2027 nung matemdang menden nungi alutsü dena lir, saka tiri taoba mapangbo yamaji meinyaktsü ta shia lir.

“Tir asoshi lenmang ishika lir... kasa ato kilonser tanaben shimtsü, ato kilonser tasen ka shimtsü, danga solution melira mapa nungi anentsü mesüra referendum agitsü,” ta pai ashi.

ALI AYOKER FOOTHILL LEMANG ANASA VIHOKHU NUNG ALI LEPSA-A AYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225



# Kohima nung U-19 Girls Sepak Takraw asayamung tenzükogo



**Kohima, Yimpoksüi/ November 25 (TYO):** Anogo asem asayatsü aliba 68buba National School Games Under-19 Girls Sepak Takraw championship Hombarnü Indira Gandhi Stadium, Hall B Kohima nung tenzükogo.

Iba asayamung ya School Games Federation of India (SGFI)-i ayongzük aser Youth Resource and Sports Department Nagaland-i host süa asayadar.

Iba asayamung nung educational society Vidya Bharati densema team 17-i shilem agidar.

Host Nagaland dak alia iba asayamung nung Andhra Pradesh, Assam, Bihar, Delhi, Gujarat, Jharkhand, Kerala, Maharashtra, Manipur, Madhya Pradesh, Punjab, Telangana, Tamil Nadu, Odisha aser Rajasthan nungi team temi iba asayamung nung shilem agidar.

Hombarnü asayamung lapokba sentong nung Advisor to Nagaland Chief Minister, Vice President of Athletics Federation of India, Secretary General of Nagaland Olympic Association & Chairman IDAN, Abu Metha alakteta

jaoker liasü. Sentong nungsa YRS Advisor S. Keoshu Yimkhiung aser SGFI field officer Himanshu Shukla natia o tatsütsü jembia liasü.

Iba sentong ya YRS Director Kethosituo Sekhose lenisüba nung agi aser Director ABCTK Pastor Neisakuolie Keseiyie-i sarasadema liasü. Kasa mapang nung YRS Secretary Anthony Ngullie-i lokti pela agizükba o jembi.

Sentong nungsa Hibolomi aser Touphema yimtsüng Youth & Sports Organisation-i sobaliba saya balala sayua liasü.

# 3buba Benchrest Air Rifle shooting tetoktepa ayonger

**Kohima, Yimpoksüi/ November 25 (TYO):** Tati Group Enterprise-i ayongzükba 3bubaHornbill Open Benchrest Air Rifle shooting competition 'Shoot to Preserve' December 3 nü Tuophema Basa Ground nung asayatsü.

Vizha Sanchu-i sangdong ka ajanga ashiba agi, asayamung nung open category, .177 category aser .177 Indian Pop category alitsü. Category asem atema entry fee ji sen 5000, 3000 aser 1500 asütsü.

Paisa, India nung air gun

yangluba company tongtiba Precihol Company, Maharashtra-i tetoktepa mapang parnok indang product tem sayatsü. Sentong nungsa bonfire, karaoke, music aser sütöksünem sentong balala ayongzükba agitsü.

# Italy-i Davis Cup final nung Netherlands kokogo



**Yimpoksüi/November 25, 2024 (Agencies):** Italy team-i quarter-century ka Davis Cup khen danga mekoki asaya aru, ajisüaka Jannik Sinner aruba sülen parnoki iba asayamung küm anabuba atonga kokogo.

Deobarnü world No. 1 asayar Sinner-i 7-6 (2), 6-2 agi Tallon Griekspoor akokba sülen Italy team-i Netherlands 2-0 agi koka liasü.

"Defending champions ama meyipa arur tanaben akokba ya onok ajak atema jangrademtsüka lir," ta Sinner-i ashi.

Spain kübok Palacio de Deportes Jose Maria Martin Carpena nung mezüngbuba kija asaya nung Matteo Berrettini-i

6-4, 6-2 agi Botic van de Zandschulp akokba sülen Italy team tejakdang toktsü.

Czech Republic-i 2012 aser 2013 küm iba asayamung atonga akokba sülen Italy ya iba asayamung küm ana atonga akokba mezüngbuba team kümogo.

Kasa mapang nung Italy tetsür team-ia Bodhbarnü Billie Jean King Cup nung Slovakia koka iba asayamung benogo.

Iba asayamung akokba nung Sinner-i team asoshi tongtibang shilem agiogo aser pai asaya pezü nung khen danga tamakok mongui asaya, kong Argentina den quarterfinals asayaba mapang Berrettini den tarep asaya ka akokba densema lir.

Kija asaya nung Lorenzo Musetti melenba sülen Berrettini-i tongtibang shilem agiogo. Berrettini ya 2021 küm Wimbledon nung runner-up liasü, saka iba sülen pa yiruba aser shirangba ajanga aiben masayateti arudar.

Final asaya nung Berrettini-i tetenzük nungibo junga masayatet, ajisüaka pai mezüngbuba set nung tatembangbuba asaya asem koka van de Zandschulp amokbanger asaya.

Tanabuba kija asaya nung Sinner-i Griekspoor den asayaba mapang ace 15 ao aser pa tour-level kija asaya nung asaya 14 tashi khen danga tamakok mongui asaya arudar.

# India-i run 295 agi Australia kokogo

**Yimpoksüi/November 25, 2024 (Agencies):** Perth nung India aser Australia na mezüngbuba Test asaya India-i run 295 agi kokogo.

Mezüngbuba Test asaya pezünübuba tatembangbuba session nung Australia team-i run 238 yanglur aliba mapang parnok ajak out sütsüba sülen India-i asaya koka Test pongu asayatsü aliba nung parnok 1-0 agi tejakdang kümogo.

2018-19 tour nungi tenzüka tang tashi nung India team Australia nung Test teku asayaogo aser parnoki Hombarnü Test akokba densema Test pongu kokogo aser ana nung dang tamakok ngur lir.

Iba mapang tsüngda West Indies team-i dang Australia nung Test asaya ka koker lir.

Pezünübuba nung batting amen tenzükba mapang Australia team nungi asayar 3 out sür parnoki run 12 yanglur liasü. Jasprit Bumrah aser Mohammed Siraj nati Deobarnü ball kanga junga ona wicket asembo agir liasü. Asaya tenzükur mapang tatsükda dang lir Siraj-i Usman Khawaja out sütsü aser iba mapang Australia-i run 17 dang yanglur liasü.

Iba sülen Steve Smith-a run 17 yanglur aliba mapang Siraj-i ball kanga junga ona out süja liasü.

Asaya nung Travis Head (89) aser Mitchell Marsh (47) nati kanga junga asaya liasü saka afternoon session nung tena Bumrah aser Nitish Kumar Reddy nati mapang tatsüka tsüngda out süja liasü.

Maneni asaya nung off-spinner Washington Sundar-i Mitchell Starc aser Nathan Lyon na out sütsü aser mapang tatsüka dang lir Nitish Rana-i slow ball tajung ka ona Alex Carey out süja India-i asaya akok.

World Test Championship final tasembuba atonga asayatsü atema India-i tanungba Test pezü nung asembo akoktsü nüngdaker.

Kasa mapang nung Australia-a World Test Championship final nung asayatsü atema India den tanungba Test pezü aser Sri Lanka den Test asaya ana asayatsü aliba nungi pongubo akoktsü nüngdaker.

India aser Australia na tanabuba Test ya Adelaide nung December 6 nü nungi tenzüka asayatsü. Iba asaya ya day-night asaya ka asütsü.

# BENDANGLI OSANG : Tapak 7 nungi... Hezbollah-i Israel nung rockets...

Deobarnü Israel nung media nung Israe aser Lebanon tsüngta Iran-i yariba militia Hezbollah den raraba tembangtsü atema ceasefire agreement ka agitsü tejakleni otar, ta sangdonga liasü.

Lebanon nungi rockets khaloktsüba osang angazükba sülen Tel Aviv area nung rocket teraksa tsükba osanga angashi, ta Israel indang police-i ashi.

Israel Defense Forces (IDF) ajanga ashiba agi kiyong ka nung indang-indanga kongshia ki kar nung mi adok aser raksatsü.

Rockets ya Tel Aviv anasa Petah Tikva aser north tsütsü Haifa, Nahariya aser Kfar Blum nunga tsük ta Israel nung osangtem ajanga ashir.

Hezbollah yagi taoba mapanga Beirut amakba langzúa Tel Aviv amaktsü nangzükba lir aser parnoki iba yimti aser anasa nung aliba military sites ana nung precision missiles khaloktsü ta ashi.

Mapang tatsüka lir IDF-ia Dahieh nung Hezbollah command centres 12 amak ta ashi, koba Beirut south tsütsü iba telok tashi ita aliba tesem

ka lir.

Israel-i tekumdangtsü magütsüi central Beirut amakba nung nisung 20 süogo ta sangdonga aliba Lebanon indang health ministry-i nisung 29 asü, ta Deobarnü sangonga liasü. Parnokisa linük nung Honibarnü nisung 84 tepset ta ashi.

Honibarnü amakba indang IDF-i sangdonga mali, saka ibai Hezbollah ketdangsur Mohammed Haydar tepsettsü meranga amakba lir ta Israel nung media nung sangdonga liasü.

Israel-i ashiba agi Hezbollah anema raraba nukjidong ya iba teloki Israel north tsütsü amakba yong tesem balala nung prokshia aliba nisung 60,000 shi meyipa shilangdaksütsü asoshi lir.

Lebanon nung October 2023 nungi nisung 3,670 dak tema tepsetogo aser 15,400 shi yiruogo aser nisung million ka dak tema pei ki yutsür tesem balala nung jenshia lir, ta Lebanon ketdangsur temi ashir.

Tesüiba hopta ka shi Israel-i Hezbollah anema raraba tesashiba akumer.

**BILEMDANGANG**  
"Temelenshiji kibok nungi tenzüktsüla."